



Fundasaun Mahein (FM), 21 Outobru 2024

Komunikadu Imprensa

## **Pareser ba Komisaun B Parlamentu Nasional kona-ba Proposta Lei Orsamentu Jeral Estadu 2025 ba Setor Defeza, Seguransa no Negósiu Estranjeiru**

Fundasaun Mahein (FM) ohin fó sai nia pareser kona-ba Proposta Lei Orsamentu Jeral Estadu (OJE) 2025, ne'ebe destaka importánsia atu hametin setor Defeza, Seguransa no Relasaun Estranjeiru ba estabilidade no dezenvolvimentu sustentável Timor-Leste nian. Dokumentu subliña nesesidade ba investimentu urjente sira iha área sira hanesan siberseguransa, seguransa marítima no jestaun imigrasaun nian, aleinde hadi'a institucional sira.

FM hatudu katak, maski Proposta OJE 2025 prevee orsamentu total US\$2.6 billoens, iha dezafiu significativu iha ezekusaun no planeamentu rekursu sira. Ezekusaun orsamentu to'o Outobru 2024 iha de'it 55,2%, ne'ebe refleto difikuldade institucional no burokrátiku ne'ebe fó impaktu negativu ba setor kriticu sira hanesan Defeza, ne'ebé ezekuta 56,9% hosi orsamentu ne'ebe alokadu, no Polisia Sientífika ba Investigasaun Kriminál (PCIC), ne'ebe hala'o de'it 56,0%.

Entre destake sira hosi análise, FM destaka área seguransa tolu ne'ebe presiza atensaun imediata:

1. Kapasidade siberseguransa, ne'ebé maka la adekuaudu atu hasoru ameasa modernu sira.
2. Kapasidade seguransa marítima, fundamental ba protesaun rekursu natural Timor-Leste nian iha nia tasi territorial sira.
3. Sistema jestaun no kontrolu imigrasaun, ne'ebe presiza modernizasaun hodi hasoru ameasa transnacional sira.

Tanba ne'e, FM rekomenda atu OJE 2025 fó prioridade ba fortalesimentu institucional iha área sira jestaun no administrasaun nian, ho foku ba ezekusaun orsamental ne'ebe eficiente no dezenvolvimentu kapasidade estratéjiku sira, ho objetivu atu garante sustentabilidade Estadu nian no moris-di'ak populasau nian.

Iha dokumentu ne'e destaka mós katak FALINTIL-Forsa Defeza Timor-Leste (F-FDTL), Servisu Nasional Intelijénsia (SNI) no Polisia Nasional Timor-Leste (PNLT) hasoru dezafiu hodi halo balansu ba sira-nia investimentu entre saláriu no dezenvolvimentu operacional, liuliu iha área krusial sira hanesan seguransa marítima no kombate krime sibernétiku.

FM konklui katak, ba tinan 2025, krusial tebes atu hadi'a koordenasau interministerial no hametin kapasidade institucional sira, liuliu iha área seguransa interna no esterna. FM mós sujere atu governu investe iha parseria internacional sira ba formasaun no kapasitasaun, ho foku iha siberseguransa no seguransa marítima, área prioridade sira hodi hasoru ameasa rejional no global ne'ebe mosu.

FM nia rekomenadasaun espesifiku sira maka tuir mai ne'e:

1. **Investe maka'as iha área siberseguransa hodi hasoru ameasa modernu sira:** Timor-Leste nia insituisaun seguransa sira seidauk iha kapasidade ne'ebe suficiente atu detekta, kombate no prevene krime siber sira sein apoiu husi ajénsia internacional sira hanesan INTERPOL. Insidente krime siber sira aumenta ba beibeik, no sei continua aumenta bainhira Timor-Leste nia internet sai lalais liu iha tempu badak. Krítiku tebes ba insituisaun estadu investe maka'as hodi hasa'e kapasidade siber-seguransa atu bele proteje dados no sistema elektronika sira ne'ebe sensitivu liu, inklui sistema internal estadu nian no mos rede telekomunikasaun sira.
2. **Investe atu hadi'a kapasidade instituisonál iha área jestaun no administrasaun:** Insituisaun sira tenke hametin sira-nia kapasidade planeamentu no ezekusaun orsamentu, minimiza burokrasia no hadi'a efisiénsia lojístika. Ida-ne'e krusial atu evita subtilizasaun rekursu sira ne'ebe maka observa iha 2024.
3. **Hametin kapasidade seguransa marítima:** Timor-Leste continua lakon rendimentu barak no rekursu natural estraga tinan-tinan tanba estadu seidauk iha kapasidade suficiente atu monitor no kontrola área marítima nasaun nian. Tanba ne'e esensiál atu investe rekursu hodi hasa'e insituisaun seguransa marítima sira nia kapasidade, inklui formasaun no teknolojia no ekipamentu hanesan ro'ó patrolha no radar. Presiza mos analiza didi'ak insituisaun estadu sira ne'ebe responsável ba seguransa marítima hodi rezolve inserteza, prevene duplikasaun servisu no garante kordensaun di'ak entre insituisaun sira.
4. **Kria sistema kontrolu imigrasaun ne'ebe modernizadu:** FM foin publika peskiza ida kona-ba Timor-Leste nia sistema imigrasaun ne'ebe facilita atividade kriminal iha rai laran no halo administrasaun estadu la eficiente. Iha artigu refere, FM rekomena ba estadu atu investe rekursu hodi kria sistema imigrasaun ida ne'ebe matenek no modernu, no adaptadu ba realidade mundu ohin loron. Ne'e inklui reforma polítika vistu no kria sistema elektronika online ba prosesamentu vistu nian.
5. **Investe iha formasaun no teknolojia:** F-FDTL no PNTL tenke aumenta investimentu iha formasaun, modernizasaun teknolojia no kapasidade marítima hodi hasoru dezafiu rejional sira, hanesan peska ilegal no tráfik marítimu. Ida-ne'e mós bele reforsa liuhosi parseria internacional sira ba formasaun espesializada.
6. **Fortalesimentu institucional:** Insituisaun sira hanesan IDN tenke halo investimentu bo'ot liu atu moderniza kurríkulu sira no miloramentu programa peskiza nian iha defeza

estratéjiku. Halo koperasaun ho LEMHANAS Indonezia nian, ho mos Austrália ho ASEAN hodi haruka peritus oin-oin mai hanorin iha IDN. Ida-ne'e sei hariku formasaun ba lideransa militar no sivil sira iha futuru.

7. **Aumenta efisiénsia iha jestaun rekursu:** Hasa'e kapasidade institusional tenke sai prioridade atu asegura katak fundu sira ne'ebe aloka uza ho eficiente liu-tan. Ministériu Interior, porezemplu, tenke halo balansu di'ak liu kona-ba gastu ba saláriu sira no nesesidade atu moderniza infraestrutura no ekipamentu seguransa nian.
8. **Kooperasaun interministerial:** Hasa'e koordenasau entre Ministériu Defeza, Interior no Negósiu Estranjeiru ne'e esensial ba implementasaun efetivu polítika seguransa nasional. Kooperasaun ida-ne'e bele ajuda rezolve ameasa transnacional sira no hadi'a efisiénsia jeral iha ezekusaun programa seguransa nian.

Fundasaun Mahein iha nafatin kompromisu ba avaliasaun krítiku no konstrutivu ba OJE, ho objetivu atu promove jestaun rekursu ne'ebe eficiente no hametin seguransa no defeza nasional Timor-Leste nian.

Atu hetan informasaun kle'an halo favor kontaktu:

**Fundasaun Mahein**

Email: [mahein2009@gmail.com](mailto:mahein2009@gmail.com)

Telemovel: (+670) 75771766

Website: [www.fundasaunmahein.org](http://www.fundasaunmahein.org)